

# Wat de Lüü all weten

**W**ell hett de Krieg tüsken Russland un de Ukraine anfangen? Up Telegram weten se dat heel wiss: Dat weren de Amerikaners, de hebben dat Maat overtrucken. De Internettkanalen van Meta weten dat aver beter: Dat weren natürelk de Russen mit hör Grootmachtgedoo.

Well hett de Pipeline in de Oostsee köttmaakt, de russisk Gas na Düütskland brengen sull? Up Telegram is dat heel düdelk: Dat weren de Amerikaners! Well sük over en Plattförm van Meta informeert, weet aver, dat de Russen dat maakt hebben. Dann wurr daar seggt, dat weren welken van de Ukraine ut – wat en feileinig Wark!

Ja, wat denn nu: Amerikaner van de Ukraine ut of Russen van de Ukraine ut, of Ukrainers sülvst? Äh, nu bün ik helemaal dörnanner: Warum un woso?

Up beid Sieden gifft dat Videos, de genau wiesen, wo wat west hett. Of dat gifft Interviews mit betreffen Minsken, de nawiesen, dat de anner Sied daar Schuld an hett un heel gräsige Saken maakt.

Nu sünd geheme Papieren van dat Pentagon klaut un in 't Internett sett worden. Ik bün al heel neeisgerig, wat Telegram un Meta-Instagram daar woll to



Cornelia Nath gehört zum Team der Autoren, die diese Kolumne schreiben.

## KOLUMNE

Moin, Moin  
**Schrievers** allerbest  
Pläseer  
Smüstern  
moje  
hoop  
**Spraak**  
**Vertellisel**

## Platt maakt

seggen. Ji mutten nämekl weten, dat alls, wat in 't Internett rumstüürt word, einzig un alleen de Wahrheit an 't Lücht brengen sall. De Biller, Videos un Interviews sünd all echt un verkökeln uns nich.

Daarför hebben wi doch en Informationsgesellschaft, dat wi all Informationen kriegen können un ge-

nau weten, wat in de Welt geböhrt!

De Meta-Plattförm worden in Amerika maakt. Bi Telegram hebben Minsken, de russisk proten of verstaahn, hör Heimaat. De Krieg tüsken Russland un de Ukraine is van Anfang of an ok en Krieg tüsken Oost un West west. Un in Kriegstieden is dat nu maal so, dat de Wahrheit toerst doodblifft. Beid Sieden willen bestimmen, wat as Wahrheit gellen sall. Un wi sitten d'r man mit.

Demokratie bruukt dat Vertrauen, dat de, de wi wählt hebben, wiss dat Beste för uns berecken willen. Dit Vertrauen word van Parteien, de still up de nahste Wahl kieken, al temelk strapseert. Man wat daar in de Internettkanalen geböhrt, kann een heel un dall in d' Will maken.

Daar worden neet blot Menens to en bestimmte Vörfall upstellt, nee, daar kriggt man gliek de hele Welt neei verklaart. Un dat Moje is, dat man sük daar nich mehr mit anner Menens utnannersetten mutt. Daar is dat all so utklammüüstert, dat dat heel keen anner Wahrheit mehr geven kann. Hej, Lüü, waakt up! Siet Reinhard Mey steiht doch fast, well de Quade is: De Moorder is alltied de Gaarner!